

Мейірімділік пен сыйластық ұштасқан мереке

Торғай боксит кен басқармасы мемлекеттік кәсіби мерекелердің барлығын шет қалдырмай, өз деңгейінде атап өтетін ұжымдардың бірі. Биыл да олар дәстүрлі түрде қазыналы қарттардың мерекесінде жетпіске жуық ардагерге кең дастархан жайып, құрмет көрсете білді.

Аталмыш шара жайылған дастарханнан бәлек, қарттардың көңіл-күйін көтеруге бағытталған түрлі ойындар ұйымдастырылып, олардың жас, бозбала шақтарындағы әсем әндер шырқалды. Сонымен қатар, осы ұжымның шығармашылық тобы Ермек Даумов, Дмитрий Ли, Александр Баранов арнайы концерттік бағдарлама қойып, соғыс жылдарындағы туындылардан, халықтың құлағынан әлі де кете қоймаған сүйікті әндерден шашу шашты. Бір сөзбен айтқанда, көнекөз қарияларымыз жастық шақтарына саяхат жасап қайтқандай болды.

Осы шарада олардың көздеріндегі қуаныш көңілге жылулық сыйлады. Директор Виктор Родиннің атынан адам ресурстарының бөлім басшысы Роза Жакупова, кәсіподақ ұйымының төрағасы Нина Старикова құттықтау сөз сөйлеп, қарияларымызға жылы лебіздерін аямады. Оған қоса, айта кету керек, аталмыш ұжым әкімшілігі және кәсіподақ ұйымының атынан қарттарымыздың әрқайсысына 3 мың теңгеден таратылды. Бұл сыйақы тек бұл мерекеде ғана емес, сонымен бірге, басқа да мемлекеттік мерекелер қарсаңында да беріліп жүр. Қоса кететін жәйт, шара ұйымдастырушылары қарттарды тек жылы лебіздерімен шығарып салмай, жыл сайынғы дәстүр бойынша 140-қа жуық зейнеткерді қыс мезгіліне екі тонна көмірмен қамтамасыз ететін болады. Белгілі болғандай шараның мақсаты, тек қана кең дастарханмен шектелмей, қарттарымызды көңілден тыс қалдырмау, оларға құрмет көрсетіп, жылы қарым-қатынасты сақтау.

Мейірімділік пен сый-



ластықты ұштастыра білген ұжымға ардагерлердің алғы-

сы шексіз.
«Торғай-ақпарат»



Қарттарым – асыл қазынам

Халқымыздың ерекшеліктерінің бірі – үлкенді сыйлау, оның сөзіне құлақ асу. Қазақ қарты жасына лайық аузы дуалы, сөзі берекелі, ісі тыңғылықты, ойы терең, ақылы телегей теңіз болып келеді. Міне, осындай теңеуге лайық қарияларды жылына бір рет келетін 1 қазан Қарттар күнімен құттықтай отырып, Арқалық медицина колледжінде «Жан жылуы» үйірмесімен «Қарттарым – асыл қазынам» атты концерттік бағдарлама өткіздік.

Мерекелік шараны колледжіміздің басшысы Динагүл Қазбаева ашып, ардагер ұстаздарымызды мереке күнімен құттықтады.

Мақсаты колледжіміздің қарт оқытушыларын мерекелерімен құттықтай отырып, оқушыларымыздың бойына халқымыздың асыл қасиеттерін сіңіру, үлкенді сыйлау, өз ата – бабасын ұмытпай сақтау үшін және салт-дәстүрден нәр алып өсуіне, инабаттылыққа, жақсы мен жаманды ажырата білуге аталы сөзден гибрат алуға тәрбиелеу.

Үлкенді сыйлау, оларға құрмет көрсету – ата-бабадан келе жатқан салтымыз. Сіздердің өмірлік тәжірибелеріңіз бен ақыл-кеңестеріңіз, тәлім-тағылымдарыңыздың біз үшін орны бөлек. Талай жасты тәрбиелеп, ізбасарларыңызды өсірдіңіздер. Бүгін, еңбектеріңіздің зейнетін көріп отырған шақта да Сіздер ұрпақтарыңызға игілік пен ізгіліктің, пайым-парасаттың үлгісін танытудан жалыққан емессіздер. Колледжіміздің мақтанышы, құрметті ұстаздарымыз Бақытжамал Қалтаева, Мәржан Молдабергеновна, Надежда Котович,

Сайлаугүл Қосанова, Болтай Камалова, Гүлбаршын Тулебаева, Бақытжамал Кульжанова әрқайсыларыңыздың колледждің өсіп-өркендеуіне қосқан үлестеріңіз бен еңбектеріңіз ерен.

Мерекелік іс – шара барысында колледжіміздің оқушылары, үйірме мүшелері әсем ән айтып, би билеп жарқын көңіл – күй сыйлады. Атап айтар болсақ, 2 курс студенттері Тұрарбек Смайыл, Сайлау Елубай, Қарлығаш Тұяқбай, «Жастар» дуэті ана, әке, әже туралы өлеңдерін айтса, «Ару» би тобы, биші қызымыз Гүлсая Жаркеева мың бұралған билерін паш етті. Оқушылар өздерінің жүрек жарды өлеңдерін оқып, әр топ оқушылары құттықтау сөз сөйлеп, қонақтарымызға гүл шоқтарын табыс етті. Шынайы да ізгі сезімдердің, білімінің алтын дінгегін сыйлаушы ұстаздар қауымы қазан айының алғашқы мерекелері қарттар, ұстаздар мерекесі тоғысқан күнімен білім алушылардың

ұйымдастырған іс-шарасы жоғары деңгейде өтті. Біздің мақсатымыз білім алушылардың бойына тәрбие арқылы жақсы игі істерді сіңіру. Біз өзіміздің ата-әжелеріміздің алдында, аға ұрпақтың алдында үлкен қарыздармыз. Ол қарызымызды тек қана жақсы тәрбиеміз арқылы, адамгершілігі мол, мейірімді болу арқылы, оларды көрген жерде құрметтеп сыйлау арқылы қайтара аламыз. Бұл қасиеттер ешқандай да ақшаға сатып ала алмайтын байлық. Ол тек адамның жүрегінде орын алатын қасиет. Олай болса, алдағы өмірлерінде жүрегі кең, адал, мейірімді, қайырымды азамат болып өсу үшін, қарттарымызды сыйлап, оларға құрмет көрсетуіміз қажет. Қарттардың алдында әрқашан да бас иіп тұрайық!

Айзада
БАЙҒАБҰЛОВА,
«Жан жылуы»
үйірмесінің жетекшісі.